



**PERUTUSAN DATUK BANDAR
MESYUARAT MAJLIS BIL. 1/2022
24 JANUARI 2022 (21 JUMADAL AKHIRAH 1443H)**

BISMILLAHIRRAHMANIRRAHIM

Assalamualaikum warahmatullahi wabarakatuh dan Salam Sejahtera.

1. Alhamdulillah, syukur ke hadrat Illahi di atas segala limpah kurnia-Nya, di atas kepelbagaian nikmat yang diberikan kepada kita dan diberikan nikmat kesihatan untuk menghadiri Mesyuarat Majlis yang pertama pada tahun ini. Selawat dan salam kepada junjungan Nabi Muhammad SAW, keluarga Baginda SAW, para sahabat dan bagi mereka yang mencontohi Baginda SAW.

Terima kasih saya ucapkan kepada Ahli-Ahli Majlis, Timbalan Datuk Bandar, Ketua-ketua Jabatan, pegawai-pegawai serta seluruh warga kerja Majlis Bandaraya Petaling Jaya atas kerjasama yang baik diberikan kepada saya dalam tadbir urus bandar raya Petaling Jaya.

Saya amat berharap, sokongan dan komitmen yang jitu ini sentiasa berpanjangan dalam usaha kita untuk menyediakan dan memberikan perkhidmatan yang terbaik kepada masyarakat dan merealisasikan penyampaian perkhidmatan dan program-program Majlis.

Perkhidmatan Majlis Bandaraya Petaling Jaya akan terus dilaksanakan dengan amalan norma baharu dan pematuhan terhadap Prosedur Operasi Standard (SOP) yang dikeluarkan oleh Majlis Keselamatan Negara. Oleh yang demikian, saya memohon kerjasama semua pihak agar dapat menyediakan dan memberikan perkhidmatan yang terbaik.

Tuan-tuan dan puan-puan yang dihormati sekalian,

2. Perkembangan dunia global telah membentuk hala tuju baharu perkhidmatan awam dalam menyampaikan maklumat dan perkhidmatan kepada pelanggan. Sektor awam kini berdepan dengan pelbagai cabaran ekoran perubahan persekitaran dan peningkatan ekspektasi rakyat dan komuniti perniagaan. Penyampaian perkhidmatan yang cekap, berintegriti, berkesan, dan mesra pelanggan adalah penting dalam usaha membentuk Kerajaan yang mesra rakyat menerusi pendekatan "**Merakyatkan Perkhidmatan Awam**".

Kerajaan sentiasa komited dalam usaha memperkukuh dan memantapkan lagi sistem penyampaian perkhidmatan. Malah, keperluan kepada transformasi, inovasi dan digitalisasi terkini dalam penyampaian perkhidmatan bukanlah lagi satu pilihan tetapi suatu kemestian. Sistem penyampaian perkhidmatan perlu menekankan kepada matlamat untuk memenuhi keperluan dan objektif pelanggan, sama ada masyarakat umum mahupun komuniti perniagaan.

Cabaran dalam menangani penularan pandemik COVID-19 tidak akan sama sekali menghalang usaha memperkasa sektor awam yang menjadi satu daripada agenda utama kerajaan dalam memastikan sistem perkhidmatan cekap yang berterusan, telus, dan mesra rakyat. Kini, terletak di bahu penjawat awam untuk bersama-sama membudayakan norma baharu dalam gerak kerja agar perkhidmatan yang ditawarkan akan tetap disampaikan secara efektif dan tuntas kepada golongan sasaran di samping dapat meningkatkan lagi mutu perkhidmatan kerja.

Pihak Berkuasa Tempatan merupakan agensi **barisan hadapan** yang paling kerap berurusan terus dengan rakyat termasuk pemaju, peniaga dan pelabur. Maka perkhidmatan PBT akan sentiasa menjadi penanda aras kecekapan dan prestasi perkhidmatan Kerajaan. Penggunaan

teknologi dalam memperkasa penyampaian perkhidmatan PBT merupakan usaha dan iltizam Kerajaan dalam memastikan hasrat dan agenda untuk memberikan perkhidmatan terbaik kepada rakyat menjadi realiti.

Kita yang berkhidmat di PBT perlu memainkan peranan yang amat penting dalam pentadbiran Kerajaan. Sebagai agensi barisan hadapan, Majlis Bandaraya Petaling Jaya mempunyai impak langsung kepada **kesejahteraan hidup rakyat di Petaling Jaya**, dengan memberikan perkhidmatan yang berkualiti, khususnya dalam aspek pengurusan kewangan, perkhidmatan teras dan perkhidmatan pelanggan.

Justeru, **inovasi dan kreativiti perlu sentiasa menjadi budaya kerja MBPJ** agar usaha-usaha untuk menambah baik sistem penyampaian perkhidmatan dapat dilaksanakan dengan lebih berkesan. Ia amat penting bagi Majlis menambah nilai modal insan dan memperkasa tadbir urus organisasi.

Tuan-tuan dan puan-puan yang dihormati sekalian,

3. Prestasi kutipan keseluruhan hasil Majlis sehingga 31 Disember 2021 adalah sebanyak RM355,941,377 atau 96.56% berbanding dengan anggaran hasil disemak sebanyak RM 368,609,090. Ini menunjukkan kutipan hasil keseluruhan Majlis masih lagi stabil walaupun masih mengalami tempoh pandemik.

Usaha-usaha meningkatkan kutipan hasil seperti memudahkan dan menggalakkan pembayaran secara *online*, membuka kaunter bergerak di luar ibu pejabat, serta kaedah mengurangkan tunggakan hasil dengan melaksanakan operasi bersepadu secara berjadual, sentiasa mengeluarkan notis peringatan mesra bayaran tetap diteruskan dengan kerjasama daripada pelbagai jabatan yang mengutip hasil.

Bagi prestasi perbelanjaan pula, sehingga 31 Disember 2021, sebanyak RM 334,707,968 atau 86.56% berbanding anggaran perbelanjaan disemak sebanyak RM 386,663,130. Prestasi perbelanjaan adalah berdasarkan kepada *trend* perbelanjaan semasa Majlis. Tidak ketinggalan juga, di antara perbelanjaan yang telah dikeluarkan oleh Majlis adalah bagi membantu pengurusan teknikal bencana banjir selain daripada kerahan tenaga sukarelawan oleh kakitangan daripada pelbagai jabatan, pegawai dan kakitangan Majlis yang menghadapi musibah telah menerima sumbangan bagi meringankan beban mereka. Sejumlah RM 255,000 telah disalurkan melalui Peruntukan Datuk Bandar kepada Kelab Sukan dan Kebajikan kepada 127 orang pegawai dan kakitangan Majlis yang terlibat.

Pada keseluruhannya, prestasi kewangan Majlis pada 31 Disember 2021 masih mencatatkan lebihan kewangan (surplus) sebanyak RM 21,233,409 berbanding dengan cadangan Bajet Defisit sebanyak RM18,054,040 selepas jumlah kutipan hasil sebanyak RM 355,941,377 ditolak dengan jumlah perbelanjaan mengurus sebanyak RM 268,073,466 dan perbelanjaan pembangunan sebanyak RM 66,634,502. Prestasi dan kedudukan kewangan Majlis masih lagi kukuh dan stabil serta masih mampu bertahan ketika berdepan kekangan pandemik.

Berdasarkan usaha-usaha strategik dan berterusan yang sedang dilaksanakan, adalah dijangkakan *trend* positif ini akan terus kekal sehingga tahun 2022. Kawalan perbelanjaan berhemah diunjurkan untuk terus digunapakai bagi memastikan kedudukan kewangan Majlis sentiasa baik dan dapat mendepani unjuran Bajet Defisit pada tahun 2022.

Tuan-tuan dan puan-puan yang dihormati sekalian,

4. Mengambil aspirasi permulaan tahun baru 2022 ini, saya berharap agar kita dapat memberikan komitmen, mutu kerja dan keazaman yang tinggi bagi memastikan prestasi kerja terus cemerlang dalam mencapai matlamat dan objektiv Majlis. Untuk melangkah ke hadapan yang lebih cemerlang, kita harus bijak mengurus perancangan dan pelaksanaan kerja bagi menzahirkan kejayaan selain tegas dalam mengatasi pelbagai kelemahan dan kekurangannya. Cabaran besar yang perlu ditangani dalam usaha tersebut ialah pemantapan etika dan integriti.

Hasrat Majlis ke arah mencapai matlamat PJSSR 2030 iaitu di bawah pelaksanaan 10 *thematic projects (E-Governance City)* yang memfokuskan dan memacu ke arah tadbir urus yang baik, cekap, telus, bertanggungjawab dan berintegriti, memberi penekanan kepada penggunaan teknologi pintar dan IoT (*internet of things*) bagi mewujudkan transformasi di dalam perhubungan di antara Majlis dengan penduduk, sektor perniagaan, NGO dan agensi-agensi kerajaan yang lain.

Majlis akan terus menjadi peneraju dengan pencapaian prestasi dan imej bandaraya yang cemerlang, bersih dan berintegriti. Fokus utama adalah melalui pendigitalisasian kesemua perkhidmatan dan pengurusan Majlis, tadbir urus baik berteraskan libat urus (*engagement*), pembangunan modal insan, mewujudkan rangkaian dengan bandar-bandar luar dan dalam negara di dalam pengkongsian '*best practices*' serta pematuhan dasar, polisi dan undang-undang. Bagi membentuk dan memperkasa budaya kerja yang berkualiti dalam organisasi, beberapa ciri harus diberi perhatian antara lain adalah seperti:

- a) Orientasi warga kerja haruslah bergerak di atas landasan yang betul sebagai prasyarat bagi menjayakan budaya kerja cemerlang iaitu mesti ada komitmen, mempunyai kesedaran kualiti, bersedia menerima perubahan dan tiada batasan masa untuk cemerlang.
- b) Komitmen daripada setiap warga kerja bagi meningkatkan kecemerlangan organisasi adalah dituntut.
- c) Kerja yang hendak dilaksanakan perlu dilakukan dengan sepenuh hati atas kehendak organisasi dengan mengetepikan segala kepentingan lain khususnya kepentingan peribadi.
- d) Mewujudkan dan memperkukuh '*mind-set*' yang berorientasikan kecemerlangan supaya warga kerja lebih komited kepada matlamat utama Majlis.
- e) Sentiasa menggalakkan warga kerja menghayati serta mempraktikkan amalan-amalan pengurusan yang boleh meningkatkan kecemerlangan organisasi.

Justeru, kita perlu memainkan peranan penting dan bertanggungjawab untuk menguruskan sumber tenaga manusia dengan sebaiknya. Tindakan pembetulan haruslah merangkumi usaha-usaha pencegahan sebelum sesuatu itu berlaku. Ini termasuklah mewujudkan persekitaran suasana kerja yang menarik, mengadakan aktiviti-aktiviti yang boleh mewujudkan semangat kerjasama.

Tuan-tuan dan puan-puan yang dihormati sekalian,

5. Majlis Bandaraya Petaling Jaya telah melaksanakan pelbagai **program bagi mencergaskan ekonomi** terutamanya Pasca COVID-19 bagi usahawan mikro di Petaling Jaya. Ianya juga selaras dengan 10 *Thematic Projects* PJSSR 2030 sebagai *Economic Vibrant City*. Majlis telah mewujudkan empat lokasi bazar Tahun Baharu Cina sempena perayaan Tahun Baharu Cina. Bazar Tahun Baharu Cina 2022 ini telah mula beroperasi pada 2 Januari 2022 yang lalu sehingga 4 Februari 2022 yang melibatkan tawaran sejumlah 71 petak di **Pasar Awam Jalan Othman, Pasar Taman Megah, Pasar Kampung Chempaka dan Dataran Boulevard, Seksyen 52.**

Majlis juga telah membuka permohonan bagi permit Bazar Ramadhan 2022 bermula 7 Januari 2022 sehingga 20 Januari 2022. Permit Bazar Ramadhan 2022 melibatkan sejumlah 1,395 petak di 20 lokasi bazar di Petaling Jaya seperti di **Jalan PJS 2/3, Taman Sri Manja PJS 1/30, Kg Lindungan PJS 6/3, Desa Mentari PJS 6/5, SS 6/1 Kelana Jaya, SS 8 Sg Way, Seksyen 17/1A, Seksyen 14/27 (Pasar Seksyen 14), Seksyen 51A Kg Baiduri, Seksyen 8 Sg Jernih, Seksyen 3 Jalan Sentosa 3/57, Lembah Subang, Kg Sg Kayu Ara, Seksyen 4 Kota Damansara, Jalan Teknologi 3/1 Kota Damansara, Apartment Meranti Bandar Sri Damansara, Apartment Vista Business Centre Damansara Damai, Prima Damansara dan Jalan Kenyalang 11/1 Kota Damansara** (yang merupakan lokasi baru). Selain daripada itu, Majlis juga akan membuka tawaran tender terbuka bagi Bazaria (Bazar Aidilfitri) di Tapak Letak Kereta Stadium Kelana Jaya, SS 7.

Tuan-tuan dan puan-puan yang dihormati sekalian,

6. **Inspektorat Anugerah Khas Keselamatan Perlindungan** dilaksanakan untuk menilai dan mengukur prestasi bagi memastikan penyampaian sistem pengurusan keselamatan perlindungan semua Jabatan/Agensi Kerajaan berada pada tahap yang cemerlang. Inspektorat ini bertujuan memberi pengiktirafan ke atas tadbir urus keselamatan perlindungan terbaik dalam kalangan Jabatan/Agensi Kerajaan dan menggalakkan **pembudayaan persekitaran pengurusan keselamatan perlindungan yang mampan.**

Justeru, pada 12 Oktober 2021 yang lalu, Inspektorat Anugerah Khas Keselamatan Perlindungan di Majlis Bandaraya Petaling Jaya telah diadakan secara dalam talian oleh Pejabat Ketua Pegawai Keselamatan Kerajaan Negeri Selangor. Inspektorat ini telah dilaksanakan oleh Pegawai Keselamatan Kerajaan dari Pejabat Ketua Pegawai Keselamatan Kerajaan Malaysia, Negeri Selangor dan dibantu oleh tiga (3) orang lagi panel penilai.

Skop Inspektorat Anugerah Khas Keselamatan Perlindungan ini meliputi aspek perancangan, pelaksanaan dan pematuhan terhadap kehendak Akta Rahsia Rasmi 1972 (Akta 88), Arahan Keselamatan, Pekeliling Keselamatan dan Surat Pekeliling Keselamatan yang telah ditetapkan. Inspektorat juga telah dilaksanakan terhadap dokumen rasmi, pengurusan fail dan rekod serta menganalisa data yang berkaitan dengan memberi penekanan kepada 4 aspek utama iaitu Komitmen Pengurusan, Keselamatan Fizikal, Keselamatan Dokumen dan Keselamatan Peribadi.

Berdasarkan Inspektorat yang dijalankan, Majlis Bandaraya Petaling Jaya memperolehi peratusan pencapaian sebanyak 95.6 peratus sekali gus menjadikan tahap keselamatan perlindungan MBPJ berada di

tahap yang cemerlang. Sehubungan itu, sebagai langkah keselamatan jangka panjang, semua Pegawai dan Penolong Pegawai Keselamatan MBPJ yang telah dilantik hendaklah mengambil langkah proaktif dan mengamalkan tadbir urus dan amalan terbaik ke arah mencapai keselamatan perlindungan yang menyeluruh melalui penyediaan dan pelaksanaan perancangan pengurusan keselamatan perlindungan termasuklah pengurusan risiko, pelan kontingensi dan *standard operating procedure (SOP)*

Tuan-tuan dan puan-puan yang dihormati sekalian,

7. Majlis Bandaraya Petaling Jaya telah melaksanakan trafik dan kesesakan lalulintas di jalan Persiaran Surian **penutupan pembahagi jalan di persimpangan tiga lampu isyarat di Persiaran Surian dan Pelangi Damansara, PJU 6, Petaling Jaya bagi tujuan kajian aliran.** Kajian ini akan melibatkan penutupan lampu isyarat dan pembahagi jalan di persimpangan tersebut.

Untuk makluman, lalulintas akan dilencongkan dengan pembinaan pusingan U di persimpangan tiga lampu isyarat di Persiaran Surian dan Jalan PJU 3/31, Petaling Jaya. Lalulintas juga akan dilencongkan di pusingan U sedia ada di Persiaran Surian berhampiran Jalan PJU 7/1, Petaling Jaya. Tempoh percubaan kajian aliran trafik ini akan berjalan selama tiga bulan bermula 8 Januari 2022 hingga 7 April 2022. Sekiranya aliran trafik berjalan lancar dan tiada bantahan penduduk maka ia akan dilaksanakan secara kekal. Para pemandu dinasihatkan supaya memandu berhati-hati dan mematuhi papan tanda isyarat yang disediakan di lokasi. Sebarang pertanyaan dan maklumat lanjut boleh hubungi Unit Lalulintas, Jabatan Kejuruteraan MBPJ di talian 03-79584221 atau e-mel *jabatankejuruteraan@mbpj.gov.my*

Tuan-tuan dan puan-puan yang dihormati sekalian,

8. Untuk makluman semua, Sebanyak **60 kes demam denggi** dilaporkan pada Minggu Epid (ME) 2 (8.1.2022). Kes ini menurun sebanyak 20 peratus daripada jumlah kes yang dilaporkan pada minggu sebelumnya iaitu **75 Kes**. Jumlah kes terkumpul sehingga ME 2 ialah sebanyak **135 kes**. Jumlah Lokaliti Wabak terkini adalah sebanyak 21 lokaliti, manakala lokaliti Wabak Aktif pada Minggu Epid (ME) 1 adalah 9 lokaliti. Tiada wabak baru dilaporkan, 14 lokaliti wabak terkawal, 2 lokalitii wabak tak terkawal dan 5 lokaliti wabak *hotspot* dicatatkan. Tiada kes kematian baru dicatatkan bagi Minggu Epid (ME) 2. Berdasarkan ini, 5 lokaliti *hotspot* yang dilaporkan adalah:

- a) Apartment Lestari PJU 10, sebanyak 32 kes dalam tempoh 81 hari
- b) Kondo Armanee PJU 8, 12 kes dalam tempoh 37 hari
- c) Teres SS 4A, 7 kes dalam tempoh 40 hari
- d) Teres SS3, 17 kes dalam tempoh 65 hari
- e) PPR Lembah Subang 2, 50 kes dalam tempoh 61 hari

Bagi mengelakkan peningkatan kes demam denggi terutamanya di lokaliti *hotspot*, usaha di peringkat Majlis adalah sentiasa menjalankan **pemeriksaan di tempat pembiakan (PTP)** dari rumah ke rumah dan persekitarannya, *larvaciding* dan semburan ruang termal serta semburan ULV. Selain itu, usaha ini digiatkan lagi dengan kerjasama Pejabat Kesihatan Daerah Petaling dengan melakukan operasi PTP pada waktu malam untuk meningkatkan peratusan kemasukan dan pemeriksaan di dalam rumah penduduk. Sebanyak 50 peratus pemeriksaan rumah telah dicapai melalui operasi malam berbanding kurang 20 peratus pemeriksaan jika dilakukan pada waktu siang.

Dalam masa yang sama, Majlis turut mendapat kerjasama yang baik daripada penduduk setempat dan sokongan Ahli Dewan Negeri Petaling Jaya serta Ahli Majlis kawasan semasa program SEDAR *walk* dijalankan. Sebanyak 3 program SEDAR *walk* telah dijalankan bersama Ahli Dewan Negeri dan Ahli Majlis. Majlis turut mengadakan pendidikan kesihatan bagi meningkatkan kesedaran dalam kalangan penduduk melalui pemasangan *banner* di lokaliti *hotspot*, edaran risalah dari rumah ke rumah, pengumuman kejadian *hotspot* melalui pembesar suara surau serta membuka pondok panas di kawasan berkenaan.

Majlis Bandaraya Petaling Jaya berharap agar masyarakat Petaling Jaya memberi kerjasama yang tinggi dalam bersama-sama memeriksa dan menghapuskan tempat pembiakan di kawasan dalam dan luar rumah serta memastikan semua bekas menakung air ditutup dan memasukkan racun jentik-jentik bagi mengelakkan pembiakan jentik-jentik *Aedes* terutamanya di dalam bekas yang bertakung air.

Saya ingin mengambil kesempatan ini untuk mengucapkan Selamat Tahun Baharu Cina kepada Ahli Majlis, pegawai dan warga kerja MBPJ yang berketurunan Tionghua. Raikanlah sambutan perayaan ini bersama keluarga tercinta dengan penuh kemakmuran dan harmoni. Jadikanlah sambutan perayaan ini sebagai satu titik kebahagiaan dalam kehidupan. Kepada yang akan pulang ke kampung halaman masing-masing, diucapkan berhati-hati di jalan raya dan pandulah secara berhemah. Sentiasa beringat menjaga SOP yang telah ditetapkan agar kita dapat memutuskan rantai wabak COVID-19.

Sekian, terima kasih.